

南齊書卷三十六

梁

蕭

子

顯

侯

列傳第三十七

謝超宗

劉祥

謝超宗陳郡陽夏人也祖靈運宋臨川內史父鳳元嘉中坐靈運事同徙嶺南早卒元嘉末超宗得還與慧休道人來往好學有文辭盛得名譽解褐奉朝請新安王子鸞孝武帝寵子超宗以選補王國常侍王母殷淑儀卒超宗作誄奏之帝大嗟賞曰超宗殊有鳳毛恐靈運復出轉新安王撫軍行參軍泰始初爲建安王司徒參軍事尙書殿中郎三年都令史駱宰議策秀才考格五問並得爲上四三爲中二爲下一不合與第超宗議以爲片辭折獄寸言挫衆魯史褒貶孔論興替皆無俟繁而後秉裁夫表事之淵析理之會豈必委牘方切治道非患對不盡問患以恆文弗奇必使一通峻正靈劣五通而常與其俱奇必使一亦宜採詔從宰議遷司徒主簿丹陽丞建安王休仁引爲司徒記室正員郎兼尙書左丞中郎以直言忤僕射劉康左遷通直常侍太祖爲領軍數與超宗共屬文愛其才翰衛將軍袁粲聞之謂太祖曰超宗開亮迴悟善可與語取爲長史臨淮太守粲既誅太祖以超宗爲義興太守昇明二年坐公事免詣東府

門自通其日風寒慘厲太祖謂四座曰此客至使人不衣自暖矣超宗既坐飲酒數甌辭氣橫出太祖對之甚歡板爲驃騎諮議及卽位轉黃門郎有司奏撰立郊廟歌敕司徒褚淵侍中謝朓散騎侍郎孔稚珪太學博士王暄之總明學士劉融何法罔何曇秀等十人並作超宗辭獨見用爲人仗才使酒多所陵忽在直省常醉上召見語及北方事超宗曰虜動來二十年矣佛出亦無如何以失儀出爲南郡王中軍司馬超宗怨望謂人曰我今日政應爲司驢爲省司所奏以怨望免官禁錮十年司徒褚淵送湘州刺史王僧虔閣道壞墜水僕射王儉嘗牛驚跳下車超宗撫掌笑戲曰落水三公墮車僕射前後言謂稍布朝野世祖卽位使掌國史除竟陵王征北諮議參軍領記室愈不得志超宗娶張敬兒女爲子婦上甚疑之永明元年敬兒誅超宗謂丹陽尹李安民曰往年殺韓信今年殺彭越尹欲何計安民具敢之上積懷超宗輕慢使兼中丞袁彖奏曰風聞征北諮議參軍謝超宗根性浮險率情躁薄仕近聲權務先諂狎人裁疎黜亟便詆賤卒然面譽旋而背毀疑間台賢每窮詭舌訕貶朝政必聲凶言腹誹口謗莫此之甚不敬不諱罕與爲二輒搆白從王永先到臺辨問超宗有何罪過詣諸貴皆有不遜言語並依事列對永先列稱主人超宗恒行來詣諸貴要每多觸忤言語怨懟與張敬兒周旋許結姻好自敬兒死後惋歎忿慨今月初詣李安民語論張敬兒不應死安民道敬兒書疏墨迹炳然卿何忽作此語其中多有不遜之言小人

不悉盡羅縵諳憶如其辭列則與風聞符同超宗罪自己彰宜附常准超宗少無士行長習民慝狂狡之跡聯代所疾迷懣之疊累朝兼觸剗容掃輒久埋世表屬聖明廣愛忍禍宣慈捨之意外許以改過野心不悛在宥方驕才性無親處恩彌戾遂連扇非端空生怨懟恣嚮毒於京輔之門揚凶悖於卿守之席此而不翦國章何寄此而可貸孰不可容請以見事免超宗所居官解領記室輒勒外收付廷尉法獄治罪超宗品第未入簡奏臣輒奉白簡以聞世祖雖可其奏以彖言辭依違大怒使左丞王遵之奏曰臣聞行父盡忠無禮斯疾農夫去草見惡必耘所以振纓稱良登朝著績未有尸位存私而能保其榮名者也今月九日治書侍御史臣司馬侃啟彈征北諮議參軍事謝超宗稱根性昏動率心險放悖議爽真嚮辭犯實親朋忍聞衣冠掩目輒收付廷尉法獄治罪處劾雖重文辭簡略事入主書被却還外其晚兼御史中丞臣袁彖改奏白簡始粗詳備厥初隱衛實彖之由尋超宗植性險戾稟行凶詖豺狼野心久暴遐邇張敬兒潛圖反噬罰未塞讐而稱怨痛枉形于言貌協附姦邪疑間勳烈構扇異端譏議時政行路同忍有心咸疾而阿昧苟容輕文略奏又彈事舊體品第不簡而豐戾殊常者皆命議親奏以彰深讐況超宗罪逾四凶過窮南竹雖下輒收而文止黃案沈浮并見輕重相乖此而不糾憲綱將替彖才識疎淺質幹無聞憑臆昇榮因慈荷任不能克己屬情少酬恩獎撓法容非用申私惠何以糾正邦違式明王度臣等參

議請以見事免彖所居官解兼御史中丞輒攝曹依舊下禁止視事如故治書侍御史臣司馬侃雖承稟有由而初無疑執亦合及咎請杖督五十奪勞百日令史卑微不足申盡敢可奉行侃奏彈之始臣等並卽經見加推糾案入主書方被却檢疎謬之誓伏追震悚詔曰超宗疊同大逆罪不容誅彖匿情欺國愛朋罔主事合極法特原收治免官如案禁錮十年超宗下廷尉一宿髮白皓首詔徙越州行至豫章上敕豫章內史虞悰曰謝超宗令於彼賜自盡勿傷其形骸明年超宗門生王永先又告超宗子才卿死罪二十餘條上疑其虛妄以才卿付廷尉辯以不實見原王永先於獄自盡

劉祥字顯徵東莞莒人也祖式之吳郡太守父徵太宰從事中郎祥宋世解褐爲巴陵王征西行參軍歷驃騎中軍二府太祖太尉東閣祭酒驃騎主簿建元中爲冠軍征虜功曹爲府主武陵王彥所遇除正員外祥少好文學性韻剛疎輕言肆行不避高下司徒褚淵入朝以腰扇鄣日祥從側過曰作如此舉止羞面見人扇鄣何益淵曰寒士不遜祥曰不能殺袁劉安得免寒士永明初遷長沙王鎮軍板諮議參軍撰宋書譏斥禪代尙書令王儉密以啟聞上銜而不問歷鄱陽王征虜豫章王大同馬諮議臨川王驃騎從事中郎祥兄整爲廣州卒官祥就整妻求還資事聞朝廷於朝士多所貶忽王奐爲僕射祥與奐子融同載行至中堂見路人驅驢祥曰驢汝好爲之如汝人才皆已令僕著連珠十五首以寄其懷辭曰蓋聞興

教之道無尚必同拯俗之方理貴祛弊故揖讓之禮行乎堯舜之朝干戈之功盛於殷周之世清風以長物成春素霜以凋嚴戒節蓋聞鼓鼙懷音待揚桴以振響天地涵靈資昏明以垂位是以俊乂之臣借湯武而隆英達之君假伊周而治蓋聞懸饑在歲式羨藜藿之飽重炎灼體不念狐白之溫故才以偶時爲

劭道

以調俗爲尊蓋聞習數之功假物可尋探索之明循時則缺故班匠日往繩墨之伎不衰大道常存機神之智永絕蓋聞理定於心不期俗賞情貫於時無悲世辱故芬芳各性不待汨渚之哀明白爲寶無假荆南之哭蓋聞百仞之臺不挺陵霜之木盈尺之泉時降夜光之寶故理有大而垂權物有微而至道蓋聞忠臣赴節不必在朝烈士匡時義存則幹故包胥垂涕不荷肉食之謀王歟投身不主廟堂之算蓋聞智出乎身理無或困聲係於物才有必窮故陵波之羽不能淨浪盈岫之木無以輟風蓋聞良寶遇拙則奇文不顯達士逢讒則英才滅耀故墜葉垂蔭明月爲之隔輝堂宇留光蘭燈有時不照蓋聞跡慕近方必勢遺於遠大情係驅馳固理忘於肥遯是以臨川之士時結羨網之悲貢肆之氓不抱屠龍之歎蓋聞數之所隔雖近則難情之所符雖遠則易是以陟歎流霜時獲感天之誠泣血從刑而無悟主之智蓋聞妙盡於識神遠則遺功接於人情微則著故鍾鼓在堂萬夫傾耳大道居身有時不遇蓋聞列草深岫不改先冬之悴植松澗底無奪後凋之榮故展禽三黜而無下愚之譽千秋一時而無上智之聲蓋聞希世之

寶達時則賤偉俗之器無聖必淪故鳴玉黜於楚岫章甫窮於越人蓋聞聽絕於聰非疾響所達而閉於明非盈光所燭故破山之雷不發聾天之耳朗夜之輝不開矇叟之目有以祥連珠啟上者上令御史中丞任遐奏曰祥少而狡異長不悛徙請謁絕於私館反脅彰於公庭輕議乘輿歷貶朝望肆醜無避縱言自若厥兄浮櫬天倫無一日之悲南金弗獲嫂姪致其輕絕孤舟夏反存沒相捐遂令暴客掠奪骸柩行路流歎有識傷心攝祥門生孫狼兒列祥頃來飲酒無度言語闕逸道說朝廷亦有不遜之語實不避左右非可稱紙墨兄整先爲廣州於職喪亡去年啟求迎喪還至大雷聞祥與整妻孟爭計財物瞋忿祥仍委前遣後未至鵲頭其夜遭劫內人並爲凶人所淫略如所列與風聞符同請免官付廷尉上別遣敕祥曰卿素無行檢朝野所悉輕棄骨肉侮蔑兄嫂此是卿家行不足乃無關他人卿才識所知蓋何足論位涉清途於分非屈何意輕肆口臧詆目朝士造席立言必以貶裁爲口實冀卿年齒已大能自感厲日望俊革如此所聞轉更增甚誼議朝廷不避尊賤肆口極辭彰暴物聽近見卿影連珠寄意悖慢彌不可長卿不見謝超宗其才地二三故在卿前事殆是百分不一我當原卿性命令卿萬里思誓卿若能改革當令卿得還獄鞫祥辭祥對曰被問少習狡異長而不悛頃來飲酒無度輕議乘輿歷貶朝望每肆醜言無避尊賤迂答奉旨囚出身入官二十餘年沈悴草萊無明天壤皇運初基便蒙抽擢祭酒主簿並皆先朝

相府聖明御寓榮渥彌隆詒議中郎一年再澤廣筵華宴必參末例朝半問訊時奉天暉囚雖頑愚豈不
識恩有何怨望敢生譏議囚歷府以來伏事四王武陵功曹凡涉二載長沙諮議故經少時奉隸大司馬
竝被恩拂驃騎中郎親職少日臨川殿下不遣蟲蟻賜參辭華司徒殿下文德英明四海傾屬囚不涯卑
遠隨例問訊時節拜覲亦沾眚議自餘令王未被祇拜既不經伏節理無厚薄敕旨製書令有疑則啟囚
以天日懸遠未敢塵穢私之疑事衛將軍臣儉宰輔聖朝令望當世囚自斷才短密以諮儉儉爲折衷紙
迹猶存未解此理云何敢爲歷貶朝望云囚輕議乘輿爲向誰道若向人道則應有主甲豈有事無髣髴
空見羅謗囚性不耐酒親知所悉強進一升便已迷醉其餘事事自申乃徙廣州祥至廣州不得意終日
縱酒少時病卒年三十九祥從祖兄彪祥曾祖穆之正厝建元初降封南康縣公虎賁中郎將永明元年
坐廟臺不脩削爵後爲羽林監九年又坐與亡弟母楊別居不相料理楊死不殯葬崇聖寺尼慧首剃頭
爲尼以五百錢爲買棺材以泥洹輦送葬劉墓爲有司所奏事寢不出

史臣曰魏文帝云文人不護細行古今之所同也由自知情深在物無競身名之外一槩可蔑旣狃斯道
其弊彌流聲義所加取忤人世向之所以責身翻成害己故通人立訓爲之而不恃也

贊曰超宗蘊文粗構餘芬劉祥慕異言亦不羣遼朝失典流放南濱

南齊書卷三十六

南齊書卷三十六考證

史臣贊超宗蘊文粗構餘芬○諸本同

臣承蒼

按粗疑當作祖謂有靈運之餘芬也祖構二字見三都賦

序

南齊書卷三十六考證

南齊書卷三十七

梁

蕭

子

顯

撰

列傳第十八

到搗 劉悛 虞棕 胡諧之

到搗字茂謙彭城武原人也祖彥之宋驃騎將軍父仲度驃騎從事中郎搗襲爵建昌公起家爲太學博士除奉車都尉試守延陵令非所樂去官除新安王北中郎行參軍坐公事免除新安王撫軍參軍未拜新安王子鸞被殺仍除長兼尙書左民郎中明帝立欲收物情以搗功臣後擢爲太子洗馬除王景文安南諮議參軍搗資籍豪富厚自奉養宅宇山池京師第一妓妾姿藝皆窮上品才調流瞻善納交遊庖廚豐腆多致賓客愛妓陳玉珠明帝遣求不與逼奪之搗頗怨望帝令有司誣奏搗罪付廷尉將殺之搗入獄數宿鬚鬢皆白免死繫尙方奪封與弟賁搗由是屏斥聲玩更以貶素自立帝除搗爲羊希恭靈朔府參軍徙劉韞輔國王景文鎮南參軍並辭疾不就尋板假明威將軍仍除桂陽王征南參軍轉通直郎解職帝崩後弟賁表讓封還搗朝議許之遷司徒左西屬又不拜居家累年弟遁元徽中爲寧遠將軍輔國長史南海太守在廣州昇明元年沈攸之反刺史陳顯達起兵以應朝廷遁以猶預見殺遁家人在都從

野夜歸見兩三人持聖刷其家門須臾滅明日而遁死問至搗惶懼詣太祖謝卽板爲世祖中軍諮議參軍建元初遷司徒右長史出爲永嘉太守爲黃門郎解職世祖卽位遷太子中庶子不拜又除長沙王中軍長史司徒左長史宋世上數遊會搗家同從明帝射雉郊野渴倦搗得早青瓜與上對剖食之上懷其舊德意眊良厚至是一歲三遷永明元年加輔國將軍轉御史中丞車駕幸丹陽郡宴飲搗持舊酒後狎侮同列言笑過度爲左丞庾杲之所糾贖論三年復爲司徒左長史轉左衛將軍隨王子隆帶彭城郡搗問訊不修民敬爲有司所舉免官久之白衣兼御史中丞轉臨川王驃騎長史司徒左長史遷五兵尚書出爲輔國將軍廬陵王中軍長史母憂去官服未終八年卒年五十八弟賁初爲衛尉主簿奉車都尉昇明初爲中書郎太祖驃騎諮議建元中爲征虜司馬卒賁弟坦解褐本州西曹昇明二年亦爲太祖驃騎參軍歷豫章王鎮西驃騎二府諮議坦美鬚髯與世祖豫章王有舊坦仍隨府轉司空太尉參軍出爲晉安內史還又爲大司馬諮議中書郎卒

劉俊字士操彭城安上里人也彭城劉同出楚元王分爲三里以別宋氏帝族祖隸之汝南新蔡二郡太守父勔司空劉延孫爲南徐州初辟俊從事隨父勔征竟陵王誕於廣陵以功拜駙馬都尉轉宗慤監蠻府主簿建安王司徒騎兵參軍復隨父勔征殷琰於壽春於橫塘死虎累戰皆勝歷遷員外郎太尉司徒

二府參軍代世祖爲尙書庫部郎遷振武將軍蜀郡太守未之任復從父勸征討假靈朔將軍拜鄱陽縣侯世子轉桂陽王征北中兵參軍與世祖同直殿內爲明帝所親待由是與世祖款好遷通直散騎侍郞出爲安遠護軍武陵內史郡南江古堤久廢不緝俊修治未畢而江水忽至百姓棄役奔走俊親率厲之於是乃立漢壽人邵榮興六世同龔表其門閭俊強濟有世調善於流俗蠻王田儻在山中年垂百餘歲南譙王義宣爲荊州儻出謁至是又出謁俊明帝崩表奔赴敕帶郡還都吏民送者數千人俊人人執手係以涕泣百姓感之贈送甚厚仍除散騎侍郞桂陽難加靈朔將軍助守石頭父勸於大桁戰死俊時疾病扶伏路次號哭求勸屍勸屍項後傷缺俊割髮補之持哭墓側冬月不衣絮太祖代勸爲領軍素與勸善書譬俊曰承至性毀療轉之危慮深以酸怛終哀全生先王明軌豈有去繖輿撤溫席以此悲號得終其孝性邪當深顧往旨少自抑勉建平王景素反太祖總衆軍出頓玄武湖俊初免喪太祖欲使領支軍召見俊兄弟皆羸削改貌於是乃止除中書郞行宋南陽八王事轉南陽王南中郞司馬長沙內史行湘州事未發霸業初建俊先致誠節沈攸之事起加輔國將軍世祖鎮盆城上表西討求俊自代世祖旣不行俊除黃門郞行吳郡事尋轉晉熙王撫軍中軍二府長史行揚州事出爲持節督廣州廣州刺史將軍如故襲爵鄱陽縣侯世祖自尋陽還遇俊於舟渚間歡宴敘舊停十餘日乃下遣文惠太子及竟陵王子

賈攝衣履修父友之敬太祖受禪國除進號冠軍將軍平西記室參軍夏侯恭叔上書以柳元景中興功臣劉劭殞身王事宜存封爵詔曰與運隆替自古有之朝議已定不容復厝意也初蒼梧廢太祖集議中華門見俊謂之曰君昨直耶俊答曰僕昨乃正直而言急在外至是上謂俊曰功名之際人所不忘卿昔於中華門答我何其欲謝世事俊曰臣世受宋恩門荷齊眷非常之勳非臣所及進不違怨前代退不孤負聖明敢不以實仰荅遷太子中庶子領越騎校尉時世祖在東宮每幸俊坊閤言至夕賜屏風帷帳世祖卽位改領前軍將軍中庶子如故征北竟陵王子良帶南兖州以俊爲長史加冠軍將軍廣陵太守轉持節都督司州諸軍事司州刺史將軍如故俊父劭討殷琰平壽陽無所犯害百姓德之爲立碑祀俊步道從壽陽之鎮過劭碑拜敬泣涕初義陽人夏伯宜殺剛陵戍主叛渡淮虜以爲義陽太守俊設計購誘之虜^缺州刺史謝景殺伯宜兄弟北襄城太守李榮公歸降俊於州治下立學校得古禮器銅甬銅甗山疊罇銅豆鍾各二口獻之遷長兼侍中車駕數幸俊宅宅盛治山池造甕牖世祖著鹿皮冠被俊菟裘於牖中宴樂以冠賜俊至夜乃去後俊從駕登蔣山上數歎曰貧賤之交不可忘糟糠之妻不下堂顧謂俊曰此況卿也世言富貴好改其素情吾雖有四海今日與卿盡布衣之適俊起拜謝遷冠軍將軍司徒左長史尋以本官行北兖州緣淮諸軍事徙始興王前軍長史平蠻校尉蜀郡太守將軍如故行益州府

州事郡尋改爲內史隨府轉安西悛治事嚴辦以是會旨宋代太祖輔政有意欲鑄錢以禪讓之際未及施行建元四年奉朝請孔顗上鑄錢均貨議辭證甚博其略以爲食貨相通理勢自然李悝曰糴甚貴傷民甚賤傷農民傷則離散農傷則國貧甚賤與甚貴其傷一也三吳國之關閭比歲被水潦而糴不貴是天下錢少非穀糴賤此不可不察也鑄錢之弊在輕重屢變重錢患難用而難用爲累輕輕錢弊盜鑄而盜鑄爲禍深民所盜鑄嚴法不禁者由上鑄錢惜銅愛工也惜銅愛工者謂錢無用之器以通交易務欲令輕而數多使省工而易成不詳慮其爲患也自漢鑄五銖錢至宋文帝歷五百餘年制度世有廢興而不變五銖錢者明其輕重可法得貨之宜以爲宜開置泉府方牧貢金大興鑄錢重五銖一依漢法府庫已實國用有儲乃量奉祿薄賦稅則家給民足頃盜鑄新錢者皆効作翦鑿不鑄大錢也摩澤淄染始皆類故交易之後渝變還新良民弗皆淄染不復行矣所鬻賣者皆徒失其物盜鑄者復賤買新錢淄染更用反覆生詐循環起姦此明主尤所宜禁而不可長也若官鑄已布於民使嚴斷翦鑿小輕破缺無周郭者悉不得行官錢細小者稱合銖兩銷以爲大利貧良之民塞姦巧之路錢貨旣均遠近若一百姓樂業市道無爭衣食滋殖矣時議者多以錢貨轉少宜更廣鑄重其銖兩以防民姦太祖使諸州郡大市銅炭會宴駕事寢承明八年悛啟世祖曰南廣郡界蒙山下有城名蒙城可二頃地有燒鑪四所高一丈廣

一丈五尺從蒙城渡水南百許步平地掘土深二尺得銅又有古掘銅坑深二丈并居宅處猶存鄧通南安人漢文帝賜嚴道縣銅山鑄錢今蒙山近青衣水南青衣在側並是故秦之嚴道地青衣縣又改名漢嘉且蒙山去南安二百里案此必是通所鑄近喚蒙山獠出云甚可經略此議若立潤利無極并獻蒙山銅一片又銅石一片平州鐵刀一口上從之遣使入蜀鑄錢得千餘萬功費多乃止悛仍代始興王鑑爲持節監益寧二州諸軍事益州刺史將軍如故悛既藉舊恩尤能悅附人主承迎權貴賓客閨房供費奢廣罷廣司二州傾資貢獻家無留儲在蜀作金浴盆餘金物稱是罷任以本號還都欲獻之而世祖宴駕鬱林新立悛奉獻減少鬱林知之諷有司收悛付廷尉將加誅戮高宗啟救之見原禁錮終身雖見廢黜而賓客日至悛婦弟王法顯同宋桂陽事遂啟別居終身不復見之海陵王卽位以白衣除兼左民尙書尋除正高宗立加領驍騎將軍復故官駙馬都尉建武二年虜主侵壽陽詔悛以本官假節出鎮漢湖遷散騎常侍右衛將軍虜寇旣盛悛又以本官出屯新亭悛歷朝皆見恩遇太祖爲鄱陽王鏘納悛妹爲妃高宗又爲晉安王寶義納悛女爲妃自此連姻帝室王敬則反悛出守琅邪城轉五兵尙書領太子左衛率未拜明帝崩東昏卽位改授散騎常侍領驍騎將軍尙書如故衛送山陵卒年六十一贈太常常侍都尉如故諡曰敬